

vne grande resignation, & par les discours, d'autant plus animez qu'ils auoient fait impressiō fur son esprit. Vostre enfant n'est pas mort, disoit-elle, il a changé de païs, il est forti de la terre des mourans, pour entrer au païs des viuans: s'il n'eût pas esté baptisé vous auriez sūbiet de deplorer sa misere, mais vous luy faites tort de vous affliger de son bon-heur, Dieu peut-estre preuoyoit qu'il eust esté meschant, s'il eust fait vn plus long seiour sur la terre, & qu'il feroit allé au païs des demons: il l'a pris & la logé en sa maison pource qu'il vous aime & qu'il cherit vostre enfant, pourquoy vous en fâchez-vous? ma consolation dans le trepas de mes enfans qui viennent d'expirer aussi bien que les vostres est renfermée dans ces paroles que me dit mō cœur, tu verras tes enfans au Ciel réioüis [142] toy, ils font en assurance. L'esprit de Dieu est éloquent dans la bouche des pauures aussi bien que dans la bouche des riches, mais changeons de propos.

Le Pere estant de retour à Tadouffac, trouua que la boisson auoit causé du defordre parmy ses gens, il crie, il tance, il prie, il conjure, il fait voir l'enormité d'vn peché qui feroit autant enraciné dans les bois des Sauvages qu'il a iamais esté dans le fond de l'Allemagne, s'ils auoient de ces malheureuses potions ou boissons qui renuerfent la teste des hommes, les coupables couuerts de honte se declarent eux-mesmes, ils s'accusent, ils se condamnent, ils portent sentence contre eux-mesmes, ils l'exécutent, ils grimpent sur des rochers inacessibles, & là estās exposez à la veuë de tous ceux qui estoient en bas, & des François mesme qui auoient mouillé l'ancre deuant cette montagne, ils se font donner de grands